

四庫全書

集部

# 欽定四庫全書

集部

劔南詩藁卷十五

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官修撰臣戴衢亨

謄錄監生臣楊浚明

欽定四庫全書

劔南詩藁卷十五

宋 陸游 撰

秋興

白髮蕭蕭欲滿頭  
歸來三見故山秋  
醉憑高閣乾坤大  
病入中年日月遒  
百戰鐵衣空許國  
五更畫角只生愁  
明朝煙雨桐江岸  
且占丹楓繫釣舟

又

暮境何堪與病遭西風落葉擁亭臯極知世上人情惡  
且放江邊醉眼高應俗紛紛何日了詠詩混混寄吾豪  
碧油金鎖平生意未許人言學楚騷

八月五日夜半起飲酒作草書數紙

有漏神仙有髮僧碧幙歌枕對秋燈忽然起索三升酒  
颯颯蛟龍入剡藤

秋雨漸涼有懷興元

八月山中夜漸長雨聲燈影共淒涼遙知南鄭風霜早

已有寒熊犯獵場

又

十年前在古梁州  
痛飲無時不慣愁  
最憶夜分歌舞歇  
臥聽秦女擘箜篌

又

清夢初回秋夜闌  
牀前耿耿一燈殘  
忽聞雨掠蓬窓過  
猶作當時鐵馬看

秋風曲

秋風吹雨鳴窓紙壯士不眠推枕起牀頭金盡酒尊空  
捱馬相看淚如洗鴻門霸上百萬師安西北庭九千里  
帳前畫角聲入雲隴上鐵衣光照水橫飛渡遼健如鷗  
談笑不勞投馬箠堂堂羽檄從天下夜半斫營孱可鄙  
拾瑩讀書定何益投筆取封當努力百斤長刀兩石弓  
飽將兩耳聽秋風

送宣書記并寄其兄曇才二公

在吳識曇公至蜀識才公彌天宣書記晚乃得從容是

家固多賢天遣慰我窮  
初秋夏末時衲子各西東  
子獨惜此別共語夜燭紅  
怪我耐逆境萬事一笑空  
子顧知我否視身如枯蓬  
枯蓬未變滅姑當付之風  
家世無高年我今六十翁  
俯仰幾時客結束已囟囟  
那將須臾景更受憂患攻  
願言早來歸相就煮晚菰

起晚戲作

地偏身飽閒秋爽睡殊美  
老雞每愧渠三唱呼未起  
厨人罷晨汲童子愁屣履  
情慵雖可嘲安靜良足喜  
心空

夢亦少酣枕甘若醴不學多事人南柯豪衆蟻

飲村店夜歸

致主初心陋漢唐暮年身世落農桑草煙牛跡西山外  
又臥旗亭送夕陽

又

灩灩村醪君勿辭橙椒香美白鷺肥醉中忘却身今老  
戲逐螢光蹋雨歸

雨夜感懷



點滴空堦雨送涼  
青燈對影獨淒傷  
身如病木驚秋早  
心似鰥魚怯夜長  
鑄得黃金猶有術  
掃空白髮定無方  
蕭然禪榻君休笑  
一卷殘書伴枕傍

### 寄葉道人

白首不堪憂患纏  
要將樂事餞流年  
尋山猶費幾兩屐  
貯酒真須百斛船  
若信王侯等螻蟻  
可因富貴失神仙  
老杜詩王侯與螻蟻共盡隨丘墟  
太白詩富貴與神仙蹉跎成兩失  
驚人亦莫摩銅狄  
秦華松風足晝眠

月下小酌

昨日雨遶簷孤燈對搔首今夜月滿庭長歌倚衰柳世  
變浩無窮成敗翻覆手人生最樂事臥聽壓新酒我歸  
自梁益零落愴親友紛紛墮鬼錄何人得長久後生多  
不識詎肯顧衰朽一杯無與同敲門喚鄰叟

讀袁公路傳

成敗相尋豈有常英雄最忌數悲傷蕪蔓豆粥從來事  
何恨郵亭坐簣牀

鄰曲小飲

早稻喜登場相呼集野堂  
迎霜新兔美近社濁醪香  
茆屋滴殘雨竹籬圍夕陽  
新豐不須作真箇是吾鄉

秋夜觀月

夢回殘燭耿房櫳杳杳江天叫斷鴻  
病骨不禁風露重披衣小立月明中

又

誰琢天邊白玉盤  
亭亭破霧上高寒  
山房無客兒貪睡

常恨清光獨自看

枕上

香冷燈昏夢自驚  
清愁冉冉帶餘醒  
夜長誰作幽人伴  
惟是蛩聲與月明

秋夕大風松聲甚壯戲作短歌

人生不自憐  
坐受外物械  
榮華難把玩  
俄頃皆變壞  
山棲亦何有  
耳目差曠快  
秋郊多烈風  
夜壑起松籟  
初聞尚蕭瑟  
髣髴聽嚴瀨  
忽如倒巨浸  
便欲翻大塊  
又疑楚

漢戰瀕洞更勝敗不然六月雨雷電犇百怪三更勢稍  
歛鐵馬歸入塞孰能從吾遊洗汝胷次隘

明河篇

明河八月轉分明炯如素練西南傾年年歲歲見河漢  
坊坊曲曲聞碓聲良人萬里事征行碓聲中有玉關情  
遙知鐵衣冷如水指點明河白髮生磧中草死駱駝鳴  
萬里却望長安城兒生總角爺未見歸心頓覺封侯輕  
漢家自古有夷狄付與窮荒何足惜只願天狼無光太

白低還家為婦說安西

夜聞隣家治稻

二頃春蕪廢不耕半生名宦竟何成歸來每羨農家樂  
月下風傳打稻聲

浪迹

浪迹人間四十年鏡中不覺已華顛山川慘澹秋多感  
燈火青熒夜少眠壯志已忘榆塞外高情正在酒壚邊  
扁舟不恨無人識且復長歌入暮煙

夜步庭下有感

夜遶中庭百匝行  
秋風傳漏忽三更  
星辰北拱疎還密  
河漢西流縱復橫  
驚鵲遶枝棲不穩  
冷螢穿竹遠猶明  
書生老抱平戎志  
有淚如江未敢傾

題酒家壁

明主何曾棄不才  
書生飄泊自堪哀  
煙波東盡江湖遠  
雲棧西從隴蜀回  
宿雨送寒秋欲晚  
積衰成病老初來  
酒香菰脆丹楓岸  
強遣樽前笑口開

題書齋壁

隨分琴書適性情  
乍寒偏愛小窓明  
旋煎粟留僧話  
故種芭蕉待雨聲  
丹藥驗方非畏死  
文章排悶不求名  
是間幽事君知否  
莫怪經秋少入城

贈猫

裏鹽迎得小狸奴  
盡護山房萬卷書  
慙愧家貧策勲薄  
寒無氈坐食無魚

秋夕



羈魂虛仗些詞招病骨那禁積毀消亂葉打窓寒有信  
昏燈照幔夢無聊棧邊老驥心空在爨下殘桐尾半焦  
百感忽生推枕起碧霄銀漢正迢迢

秋雨排悶十韻

今夏久無雨從秋却少晴空濛迷遠望蕭瑟送寒聲衣  
潤香偏著書蒸蠹欲生壞簷聞瓦墮漲水見堤平溝溢  
池魚出天低塞雁征螢飛明閣廡蛙鬧雜疎更藥醖時  
須焙舟閒任自橫未憂荒楚菊直恐敗吳杭夜永燈相

守愁深酒細傾浮雲會消散鼓笛賽西成

小舟航湖夜歸書觸目

雲黑風號不見星古丘叢木聚精靈舟人已過微相語  
兩兩三三鬼火青

又

電掣半空雲黯黹舩浮積水浪憑陵茫然不辯身何處  
猶喜東南見塢燈

又

遙望湖塘炬火迎，纔歸村舍雨如傾。  
畏途回首知安在，催喚兒童暖酒鐙。

幽居書事

莫歎人間苦不諧，清時有味是歸來。  
已因積毀成高臥，更借陽狂護散才。  
正欲清言聞客至，偶思小飲報花開。  
紛紛爭奪成何事，白骨生苔但可哀。

又

安命知天更不疑，幽居最愛早寒時。  
手中書墮初酣枕，

窓下燈殘正劇甚鮮鯽每從溪女買香菰時就釣船炊  
山陰清絕君須記雪裏騎驢未辨詩

晚霽

雨斷簷餘滴雲疎日漏明人其如積潦天自活疲氓溪  
碓舂香稻霜叢剪綠橙書生久愁臥作意賦新晴

又

漲水迺舊壑浮雲歸故山園丁藝蔬去鄰婦賃春還喬  
木蒼煙外孤村落照間莫嫌樽酒薄且用破愁顏

雨後散步後園

淡日輕雲未快晴  
涓涓溝水去無聲  
為憐一徑新苔綠  
別就牆陰取路行

又

澤國霜遲木未疎  
秋來更覺愛吾廬  
芭蕉綠潤偏宜墨  
戲就明窓學草書

示客

十年犇走每思歸  
剩喜湖邊晝掩扉  
社燕免教嘲作客

海鷗曾是信忘機  
暉暉晚日收新稻  
漠漠新寒試夾衣  
留客盤飧君勿笑  
一畦蔬甲摘初稀

甲子晴

今日甲子晴秋稼始可言  
老農喜相覓隨事具雞豚  
埽地設管席酌酒老瓦盆  
耳熱仰視天何異傾金尊  
牛羊散墟落霽色滿衡門  
起舞屬父老勿恨此酒渾

後一日復雨

一雨三日水抹隄  
南村北村雲淒淒  
天公約束龍返穴

不忍嘉穀沈塗泥日光清薄潦未縮起視又嘆行雲西  
初纔浙瀝灑窓戶俄已湍瀉鳴溝溪豐凶相藥若翻手  
振救小緩輒噬臍窮閭腐儒不預此且收芋栗寬兒啼

紹興庚辰余遊謝康樂石門與老洪道士痛飲賦  
詩既還山陰王仲信為予作石門瀑布圖今二  
十有四年開圖感歎作

二十餘年別石門燈前感舊欲消魂人生萬事皆如夢  
自笑區區記劒痕

又

愛酒黃冠鬢如雪石門邂逅一樽同懸知久作此山土  
愁對畫圖秋雨中

雨中遣懷

秋稼連雲飽不疑寧期一敗莫支持雨如梅子初黃日  
水似桃花欲動時正晝螽蟴驅不去終宵鼃黽怒何為  
凶年氣象堪流涕禾把紛紛滿竹籬

秋思



秋來情味更堪論身寄城南五畝園  
委轡看山無鐵獺

梅聖俞  
馬名

拾樵煎茗有青猿王元之  
小童名陂塘夜雨添新漲原

野煙蕪滅舊痕豈是平生少親友  
略無人肯訪孤村

### 秋雨歎

點點滴滴雨到明悽悽惻惻夢不成  
窓間殘燈暗欲滅  
匣中孤劒鏗有聲少年讀書忽頭白  
一字不試空虛名  
公車自薦心實恥新豐獨飲人所驚  
太行千仞插雲立  
黃流萬里從天傾遺民久憤世多故  
孱冠何足煩長纓

霜風初高鷹隼擊天河下洗煙塵清投筆急裝須快士

令人絕憶獨孤生

獨孤策蒲人前  
歲死於峽中

雨中小酌

晨起占雲日日西吾廬煙雨正淒迷愁看場上禾生耳

且泥盃中酒到臍窓日幾時飛野馬甕天惟是舞醯鷄  
前村著屐猶通路自摘金橙擣鱸齋

衰病有感

衰與病相藥山房冷欲冰在家元是客有髮亦如僧愁

絕窮秋雨情親獨夜燈西鄰有甘井聊得曲吾肱

又

倦枕先雞覺寒汀伴雁孤寂寥誰省錄衰疾且枝梧鶴  
骨秋添瘦龜腸夜自呼蓋棺吾事定未敢泣窮途

又

羈宦一周星歸如化鶴丁灰心成寂寂霜鬢失青青小  
智空自貴大愚元不靈客來應絕倒扶病講丹經

雨止頓寒遂有晴意

霧雨昏昏地氣騰盤中朝暮厭驅蠅未看霽色排陰翳  
先覺清寒洗鬱蒸喚客喜傾新熟酒讀書貪趁欲殘燈  
明朝樂事真當賀山北山南曳瘦藤

秋晴出遊

雨餘清冷近霜天拄杖閒拖不挂錢黃葉舞風初款款  
碧渠通溜正濺濺無情日馭工催老耐事天公聽放顛  
薄暮行歌竝湖去有人偷樣畫癯僊

悲秋

形骸枯槁病侵陵  
少睡長飢一老僧  
霜夜羈愁更無賴  
莫收書策且留燈

又

蕭蕭衰鬢點新霜  
人靜房櫳易斷腸  
等是閉門愁裏過  
任教風雨壞重陽

又

殘年孤寂不禁秋  
醉自淒涼醒更愁  
富貴空成守錢虜

吾今何止百宜休

司空表聖自  
言有四宜休

又

小雨簾櫳慘淡天  
醉中偏藉亂書眠  
夢回有恨無人會  
枕畔橙香似昔年

久雨道懷

暮年惜日月  
木落輒動心  
閒居念親友  
所願聞足音  
風雨斷官道  
吾廬況幽深  
渺渺雲水鄉  
蕭蕭蘆荻林  
草茂豪鳴蛙  
天闊無來禽  
四顧此何處  
悠悠付孤斟

野步書觸目

村落初過雨園林殊未霜幽花雜紅碧野橘半青黃飛  
鷺橫秋浦啼鴉滿夕陽最憐山脚水撩亂入陂塘

月下

月白庭空樹影稀鵲棲不穩繞枝飛老翁也學癡兒女  
撲得流螢露濕衣

九月十日

不須扇障庾公塵散地翛然學隱淪風帽可憐成昨夢  
菊花已覺是陳人昏昏但苦餘醒在草草久無佳句新

歎息吾生行已矣老來歲月似犇輪

秋晴園中山禽絕多有感而賦

九日秋陰一日晴山禽應喜我閒行  
幽吭弄暖閒相命勁翮凌風遠有聲  
熟果啄餘看核墮細枝銜得欲巢成  
名園美蔭不飛去似比交朋猶有情

燈籠

我年十六遊名場靈芝借榻棲僧廊  
鐘聲纔定履聲集弟子堂上分兩廂  
燈籠一樣薄臘紙瑩如雲母含清光



還家欲學竟未暇歲月已似犇車忙書生白首故習在  
顛倒簡牘紛朱黃短檠雖復作老伴目力眩晃不可常  
平生所好忽入手摩挲把挈喜欲狂蘭膏潑灑支達旦  
秋雨蕭瑟輸新涼討論廢忘正塗乙遂欲盡發萬卷藏  
所嗟衰病終難勉非復當年下五行

舟過南莊呼村老與飲示以詩

我昔過此時荷花粲雲錦今我復來遊霜露已淒凜鄉  
鄰福苦薄積雨敗垂稔禾頭耳觺觺熟計難高枕所懼

憂吾君歲暮詔發廩勿言村醪薄排悶聊共飲

又

玄雲吞落日大風東北起隔林鳴兩鳩當道行衆螳晴  
來未三日雨候乃復爾我場何時乾嘉穀在泥滓豐凶  
歲所有遊惰古所恥努力教子孫天公終可倚

秋夜獨過小橋觀月

湖上蕭蕭葉落頻小橋東畔岸綸巾乍圓素月升寒壁  
欲散微雲蹙細鱗有酒便應遺世事得閒隨處勝官身

笑談但恨朋遊少安得幽人與卜鄰

紹興中與陳魯山王季夷從兄仲高以重九日同  
遊禹廟後三十餘年自三橋泛舟歸山居秋高  
雨霽望禹廟樓殿重複光景宛如當時而三人  
者皆下世予亦衰病無聊慨然作此詩

重樓傑閣倚虛空紅日蒼煙正鬱葱鄉國歸來渾似鶴  
交朋零落不成龍人生真與夢何校我輩故應情所鍾  
淚漬清詩却回棹不眠一夜聽鳴蛩

雜興

風雨雞喔喔雪霜柏森森獨居雖無友二物感我深

又

萬物各有時蟋蟀以秋鳴我老自少眠那得憎此聲

又

漲水入我廬萍葉黏半扉日出水返壑念汝何由歸

又

清霜染丹葉秋晚粲如春回首風吹盡天公解戲人

予秋夜觀月得瘡疾枕上賦小詩自戲

貪看霜月步亭皋不覺寒侵范叔袍且倚誦詩驅瘡鬼

斷無人寄碧腴膏

唐小說載鄭虔妻病瘡杜子美教誦子璋髑髏血模糊等句以却之又元

微之謫江陵病瘡白樂天自長安寄以碧腴膏

後春愁曲

并序

予在成都作春愁曲頗為人所傳偶見舊橐悵然有感作後春愁曲

六年成都擅豪華黃金買斷城中花醉狂戲作春愁曲

素屏紈扇傳千家當時說愁如夢寐眼底何曾有愁事  
朱顏忽去白髮生真墮愁城出無計世間萬事元悠悠  
此身長短歸山丘閉門堅坐愈生愁未死且復秉燭遊

秋花歎

秋花如義士榮悴相與同豈比輕薄花四散隨春風黃  
菊抱殘枝寂寞臥寒雨拒霜更可憐和蒂浮煙浦古來  
結交意正要共死生讀我秋花詩可代丹雞盟

寄題朱元晦武夷精舍

先生結屋綠巖邊  
讀易懸知屢絕編  
不用采芝驚世俗  
恐人謗道是神僊

又

蟬蛻巖間果是無  
世人妄想可憐渠  
有方為子換凡骨  
來讀晦菴新著書

又

身閒剩覺溪山好  
心靜尤知日月長  
天下蒼生未蘇息  
憂公遂與世相忘

又

齊民本自樂衡門水旱那知不自存  
聖主憂勤常旰食  
煩公一一報曾孫

又

山如嵩少三十六水似邛邽九折途  
我老正須閒處著  
白雲一半肯分無

病思

夜窓孤影怯青燈瘦著秋衣欲不勝  
光景正如寒圃蝶



情懷却羨病寮僧  
篝爐冷落燒殘葉  
禪榻欹斜倚古藤  
莫怪頽然遺世事  
鬢絲日日鏡中增

病愈

秋夕高齋病始輕  
物華凋落歲崢嶸  
蟹黃旋擘饒涎墮  
酒淥初傾老眼明  
提筆詩情還跌宕  
倒牀藥裹尚縱橫  
閒愁恰似憎人睡  
又起挑燈聽雨聲

病中忽有眉山士  
人史君見過欣然接之口占絕

句

蜀語初聞喜復驚依然如有故鄉情  
絳羅餅餤玻璃酒

何日墓頭伴我行

者州以羅裹餅餤至二十四子號通義餤玻璃春郡酒名也亦為西州之

冠

### 初寒

我窮不自活萬事付天公今年寒苦晚霧雨常濛濛  
雖追裘褐憂坐念疾病攻清夜喜不寐萬木號西風  
新霜纔幾何瘴癘一掃空曉看烏臼林已有數葉紅  
微雲時去來寒日猶瞳矐振衣起出户一笑尋鄰翁

出塞曲

北風吹急雪夜半埋羶廬將軍八千騎萬里逐單于漢  
家如天臣萬邦歡呼動地單于降鈴聲南來金閃鑠赦  
書已報經沙漠

無題

碧玉當年未破瓜學成歌舞入侯家如今顚顚蓬窓裏  
飛上青天妬落花

道室即事

一簪殘雪寄林亭手把黃庭兩卷經  
琴調養心安澹泊  
爐香挽夢上青冥隨緣久已均憂喜  
玩世惟須半醉醒  
溪父園公殊未見頽然誰與共忘形

夙興

青燈黃卷擁篝爐殘髮垂蓬未暇梳  
略似諸生勤夜課  
絕勝小吏迫晨趨雞聲喔喔寒猶力  
月影離離淡欲無  
幽致滿前君不領枉因畱滯歎頭顱

長安道

千夫登登供版築萬手丁丁供斲木歌樓舞榭高入雲  
複幕重簾晝燒燭中使傳宣騎飛鞚達官候見車擊轂  
豈惟炎熱可炙手五月瞿唐誰敢觸人生易盡朝露晞  
世事無常壞陂復士師分鹿真是夢塞翁失馬猶為福  
君不見野老八十無完衣歲晚北風吹破屋

記夢

夜夢有客短褐袍示我文章雜詩騷措辭磊落格力高  
浩如怒風駕秋濤起伏犇蹶何其豪勢盡東注浮千艘

李白杜甫生不遭英氣死豈埋蓬蒿晚唐諸人戰雖鏖  
眼暗頭白真徒勞何許老將擁弓刀遇敵可使空壁逃  
肅然起敬豎髮毛伏讀百過聲嘈嘈惜未終卷雞已號  
追寫尚足驚兒曹

冬夜讀書

茂陵病後非平昔瘦骨吟髭短髮疎紅燭悔從長夜飲  
青燈喜對少年書聖賢親見生非晚忿慾俱空死有餘  
破屋顏垣君勿笑更闌絃誦滿吾廬

遊僊

羅澗谷選放翁詩有遊僊七言古詩一首即飄飄初珥玉殿三絕句合成者附記于此

飄飄驚鶴杳難攀萬里東遊海上山應有世人遙稽首

紫簫餘調落雲間

又

鳳舞鸞歌宴紫宮碧桃花下醉千鍾紅塵謫滿重歸去  
花未開殘宴未終

又

玄圃春風賜宴時雙成獨奏玉參差侍晨飲醕虛皇喜

一段龍綃索進詩

又

初珥金貂謁紫皇  
僊班最近玉爐香  
為憐未慣叢霄冷  
獨賜流霞九醞觴

又

玉殿吹笙第一僊  
花前奏罷色悽然  
憶曾偷學春秋曲  
謫在人間五百年

過鄰家



今日病良已筇枝發興新高居遺世事一笑過吾鄰夕  
照明丹葉秋風老白蘋素衣雖化盡不為犯京塵

山園晚興

傳盃誰與豁幽悰霜晚黃花未滿叢過雁一聲寒靄外  
短籬數掩夕陽中易雖病裏猶能讀詩到愁邊始欲工  
惟有功名真已矣嬾將華髮對青銅

初冬出扁門歸湖上

桑柘枝空葉作堆斜陽更著角聲催雲歸玉笥茫茫去

水下蘭亭曲曲來稻壠受犂寒欲遍漁船入市晚爭回  
貂裘破弊霜風冷愁對青燈撥瓮醅

新寒小醉睡起日已高戲作

倦眼矇矓睡易成華胥稅駕不多程衾重枕穩當霜夕  
羶暖屏深擁宿醒栩栩蝶魂閒自適縣縣龜息靜無聲  
幽棲豈是忘微祿正怕條鈴擾五更

太息

閒將白髮照清溝太息年光逝不留勲業無期著書晚

此生與世判悠悠

冬夜讀書

平生喜藏書拱壁未為寶歸來稽山下爛漫恣探討六  
經萬世眼守此可以老多聞竟何用綺語期一掃幽居  
出戶稀衰病擁爐早青燈照黃卷作意勿草草

晚步

地爐附殘火將夕鳥雀喧食已了無事扶杖閒出門披  
披歸雲陣淡淡新月痕平生足憂患歲晚信乾坤緩步

牛羊巷浩歌桑柘村九原不可作吾意與誰論

村舍

空谷人稀到新寒病頓輕晨霜催小獵宿雨潤新耕草  
莽秦馳道雲煙越故城千年不磨滅惟有暮山橫

野步至近村

隨意出柴荆清寒作晚晴風吹雁北鄉雲帶月東行童  
稚爭追逐漁樵習送迎白頭寧復仕惟此餞餘生

夜坐油盡戲作

金樽畫燭少年豪  
白首孤燈不厭勞  
夜漏雖深書未竟  
半缸誰與續殘膏

又

欲盡殘燈更有情  
可憐剪斷讀書聲  
區區紙上太癡計  
一笑開門看月明

歲暮

離離井上桐鬱鬱牆下桑  
零落豈不悲無奈中夜霜  
蟋蟀更可念歲暮依客牀  
客亦自孤寂衣篝歇殘香  
一燈

挂西壁耿耿青無光援筆欲寫愁三喟不成章

幽居感懷

偶傍楓林結數椽東歸也復度流年汀洲雁下依殘水  
墟里人行破夕煙十月風霜欺客枕五更鼓角滿江天  
散關清渭應如昨回首功名一愴然

山中夜歸戲作短歌

駿馬不用換美妾名酒不用博涼州霜天飲酒騎馬出  
馳獵蹴蹋川原秋少年意薄萬戶侯白首乃作窮山囚

箭鋒豈必盡狐兔  
宵次聊欲平山丘  
夜歸湖上酒初醒  
莊舍蕭條燈火冷  
解刀自笑太麤生  
却染松煤飛兔穎

### 狂歌

少年雖狂猶有限  
遇酒時能傲憂患  
即今狂處不待酒  
混混長歌老巖澗  
拂衣即與世俗辭  
掉頭不受朋友諫  
挂帆直欲截煙海  
策馬猶堪度雲棧  
枵然癡腹肯貯愁  
天遣作盜盛藜苳  
髮垂不櫛性所便  
衣垢忘濯心已慣  
眼前故人死欲無  
此生行矣風雨散  
羞為塵土伏轅駒

寧作江湖斷行雁

遲暮

遲暮固多感況此歲崢嶸霜霰忽已集夜聞絡緯鳴青  
燈不解語依依有餘情銅瓶煮寒泉中作笙簫聲沈憂  
能傷人一夕白髮生蓬萊渺雲海金丹幾時成

種秫

種秫供留客移花待探春愁邊開樂國鬧裏作閒身鬢  
髮今如此頭顱莫問人白鷗非避俗野性自難馴



擁爐

睡少人人笑老生擁爐孤坐欲三更月移西去失花影  
風自北來傳漏聲鳧鼎煎茶非俗物雁燈開卷愜幽情  
興来自喜猶彊健一紙清詩取次成

冬夜吟

昨夜凝霜皎如月碧瓦鱗鱗凍將裂今夜明月却如霜  
竹影橫窓更清絕造物有意娛詩人供與詩材次第新  
飢鴻病鶴自無寐山窮水絕誰為鄰西村梅花消息動

唧唧寒醅漸鳴瓮儘將醉帽插幽香此生莫作長安夢  
讀書罷小酌偶賦

歲晚淒涼冰雪晨頽垣破屋鏡湖濱浮生亦念古有死  
壯氣要使敵無人黃卷展殘三太息綠尊酌罷一頓伸  
躬耕不預差科事猶向清時作幸民

移花遇小雨喜甚為賦二十字

獨坐閒無事燒香賦小詩可憐清夜雨及此種花時

書生歎

君不見城中小兒計不疎賣漿賣餅活有餘夜歸無事  
喚儔侶醉倒往往眠街衢又不見壠頭男子手把鉏丁  
字不識稱農夫筋力雖勞憂患少春秋社飲常歡娛可  
憐秀才最誤計一生衣食囊中書聲名纔出衆毀集中  
道不復能他圖抱書餓死在空谷人雖可罪汝亦愚嗚  
呼人雖可罪汝亦愚曼倩豈即賢侏儒

冬夜醉解殘燈熒然起讀書至明賦詩十韻

冬夜厭久坐頗幸一醉眠滿酌文舉尊徑臥子敬糟鼻

雷未及作眼電遽瞭然孤燈如秋螢喚我開陳編初欲  
限一卷隨手紛聯翩歡然不知疲忽已晨烏遷嗟我行  
六十衰病迫殘年仕進今永塞文章後誰傳飽食而安  
寢此計定自賢勿學草玄翁死為人所憐

夜行

路長憂炬盡馬弱畏泥深腸斷猿啼樹魂驚鬼嘯林艱  
危窮自慣寒苦老難禁回首金牛道加鞭負壯心

頃自  
小益

還南鄭夜宿金牛驛時方大寒  
人馬俱欲僵仆今十二年矣

遊淳化寺

蕭寺久不到偶來幽興長  
螳穿珠九曲蜂釀蜜千房  
雨

過山橫翠霜新橋弄黃  
年衰道不進珍重一爐香

僧問極迷

如何是祖師西來意師曰古  
殿一爐香極迷即淳化也

餘慶出遊夜歸

杖藜尋勝愜幽情  
芒屨如飛病體輕  
迎客野梅纔半吐  
避人山雉尚徐行  
東谿水落灘聲壯  
南嶺雲酣雪意成  
薄暮歸來僧已定  
佛龕獨對一燈明

遊前山

兀兀無歡意閒遊未擬回  
屐聲驚雉起風信報梅開  
山雪堆僧衲溪流動蟄雷  
平生一桐帽自惜犯塵埃

齋前獨坐戲作

閉戶學僧坐頽然遺世情  
虛窓鷓鴣飛影枯葉犬行聲  
雪擁杉灰煖雲垂紙帳明  
清饒不可耐一笑聽華鯨

晚同僧至谿上

耽耽臥石熊當道矯矯長松龍  
上天不怕雪雲寒到骨

喚僧扶杖立橋邊

僧飯

雲碓舂粳白齋厨爨桂香  
百窮慚燕頤一飽慰龜腸  
舉世知心少平生為口忙  
何當棄簪笏終老掩山房

山店賣石榴取以薦酒

山色蒼寒雲釀雪旗亭據榻興悠哉  
麴生正欲相料理  
催喚風流措措來

平水小憩

蓐食草菴中肩輿小市東霧收山淡碧雲漏日微紅酒  
旆村場近罾船浦淑通平生喜行路小住莫怱怱

自若耶溪舟行杭鏡湖而歸

換馬亭前煙火微鬪牛橋畔行人稀雲山慘澹少顏色  
霜日青薄無光輝新酒筍成桑正落美人信斷雁空歸  
高樓何處吹長笛清淚無端又濕衣

宴坐

鼓樂弦歌萬二千天魔剗欲破幽禪道人袖手心如水



一點紗燈夜悄然

遊山歸偶賦

此生本寄一浮漚歸臥茅茨又四秋  
習氣未除惟痛飲  
幻軀偶健且閒遊  
買蓑山縣雲藏市橫笛江城月滿樓  
與世沈浮最安樂莫思將相快恩讐

六十吟

人生久矣無百年六十七十已為壽  
嗟予忽忽蹈此境  
衰髮如蓬面枯瘦孤松摧折老澗壑  
病馬淒涼依棧豆

尚無籌策活目前豈有功名付身後壁踈風入燈焰搖  
地爐火盡寒蕭蕭胃中白虹吐千丈庭樹葉空衣未續

舒悲

嗜酒苦猖狂畏人還齷齪老病始悔歎天下無此錯管  
葛逝已久千古困俗學捫蝨論大計使我思景畧中原  
失枝梧煙塵暗河洛天道遠莫測士氣伏不作煌煌東  
觀書無乃太寂寞丈夫不徒死可作一丘壑歲晚計愈  
踈撫事淚零落

山園晚興

病骨初輕野興濃  
閒扶拄杖夕陽中  
草枯陂澤涓涓水  
木落園林淅淅風  
楊子淒涼老天祿  
馬周顛顚客新豐  
壯心未與朱顏改  
一笑憑高送斷鴻

獨立

獨立柴荆外  
頽然一秃翁  
亂山吞落日  
野水倒寒空  
憂患工催老  
飄零敢諱窮  
漁歌亦何恨  
淒斷滿西風

探梅

半吐幽香特地奇正如官柳弄黃時放翁頗具尋梅眼  
可愛南枝愛北枝

又

江路雲低糝玉塵暗香初探一枝新平生不喜凡桃李  
看了梅花睡過春

遠興

莫言人事足悲傷只為詩情合斷腸窓檻雨晴湖灩灩  
郊墟煙重月茫茫梅花調苦愁三弄竹葉香清泥一觴

閉戶終年嗟局促不如新雁到衡湘

張功甫許見訪以詩堅其約

零落汀蘋露氣清北窓昨夜已秋聲  
書來屢有入東約坐上極思虛左迎  
激烈哦詩殷金石縱橫落筆走蛟鯨  
吾曹此事期千載老眼相逢剗要驚

劔南詩藁卷十五

欽定四庫全書

劔南詩豪卷十六

宋 陸游 撰

夜夢與數客觀畫有八幅龍湫圖特奇客請予作  
詩其上書數十字而覺不復能記明旦乃追補  
之亦髣髴夢中意也

高堂閱畫娛嘉賓巨幅小卷縱橫陳其間一圖最傑作  
命意落筆驚倒人奇峰峭立插地軸飛瀑崩瀉垂天紳

壽藤老木幻荒怪深潭危棧愁鬼神忽然白晝起雷電  
始覺異物蟠齋淪陰雲四興誅老魃甘澍連夕蘇疲民  
豈惟陂澤苗盡立已活億萬介與鱗文章與畫共一法  
腕力要可回千鈞錙銖不到便懸隔用意雖盡終苦辛  
君看此圖凡幾筆一一圓勁如秋蓴乃知世間有絕藝  
天造草昧參經綸吾言未竟且復止剡發幽奧天公嗔

泛舟

女牆齧齧帶斜暉短棹還從剡曲歸木葉經霜渾欲盡



人家近水自相依逢迎俗客言多忤顛沛窮途計易非  
雪裏閉門殊不惡故貂雖弊勝無衣

夜聞大風感懷賦吳體

故都宮闕汙羶腥原野久稽陳大刑未須校尉戍西域  
先要將軍空朔庭意言揮戈可退日身乃讀書方聚螢  
病起窓前髮如雪夜聞風聲孤涕零

骨相

骨相元知薄功名敢自期病侵彊健日間過聖明時形

勝輪臺地飛騰瀚海師江湖雖萬里猶擬綴聲詩

有感

書生事業絕堪悲橫得虛名毀亦隨怖懼幾成牀下伏

艱難何啻劒頭炊貸監河粟元知誤乞尉遲錢更覺癡

已卜一菴鵝鼻谷

鵝鼻谷在秦望山秦刻石之所崖嶺巉峻

可無芝朮療朝

飢

又

讀遍名山萬卷藏殘年肯受俗低昂正須嘯詠風濤上

未至悲辛酒肉旁夢裏功名誰復計閒中日月不勝長  
虛皇有詔君知否盡賜江湖作醉鄉

城西晚眺

嫋嫋城笳咽熒熒漁火青霜凋兩岸柳水浸一天星靜  
看船歸浦遙聞雁落汀倚闌幽興極不敢恨飄零

苦寒

凍硯時能出苦吟濁醪亦復慰孤斟誰知冰雪凝嚴候  
自是乾坤愛育心癘鬼盡驅人意樂遺蝗一洗麥根深

但嫌景短妨書課棲鳥紛紛又滿林

夙興

病後精神殊未減披衣每起待晨雞愛書不厭如平壑  
戒酒新嚴似築堤莫歎茅茨常局促猶勝簿領苦沈迷  
迎長漸近丹當熟已覺溫溫下徹臍

冬夜讀書甚樂偶作短歌

衰病作書崇常恨無新功兔甌供茗粥睡思一洗空郊  
居近城闌漏鼓傳鼕鼕絳帙開爛漫牙籤紛疊重朱黃

參筆墨照映燈花紅魯壁汲冢祕天遣慰困窮衮衣窺  
藻火宗廟聽笙鏞端居得至樂生世豈不逢藜羹冷未  
啜裋褐忘嚴冬拜手謝造物不須黑頭公

冬夜月下作

造物寧能困此翁浩歌庭下畚松風煌煌斗柄插天北  
焰焰月輪生海東皂纛黃旗都護府綦冠長劒大明宮  
功名晚遂從來事白首江湖未歎窮

感憤

今皇神武是周宣  
誰賦南征北伐篇  
四海一家天厯數  
兩河百郡宋山川  
諸公尚守和親策  
志士虛捐少壯年  
京洛雪消春又動  
永昌陵上草芊芊

蓬戶

蓬戶真堪設爵羅  
歲時野老自相過  
人情靜處看方見  
詩句窮來得最多  
枕上長歌時激烈  
樽前一笑且婆娑  
白頭萬事都經遍  
莫為悲傷損太和

行後園

霜風吹枯桑落葉乾有聲陂池日已涸沙水見底清人  
生非金石歲暮難為情安得天邊鵠駕之以遐征

曉出遇獵徒有作

出門萬瓦粲晨霜忽憶行軍起裹創賣劍買牛身已老  
褰旗斬將夢猶狂竒才古有潛屠肆豪氣今誰寓獵場  
狐兔草間何足問合留長箭射天狼

贈道侶

崎嶇世路久知難準擬丹成玉鍊顏十載尋人遍巖穴

一樽隨處對溪山  
蘇門晝寂聞舒嘯  
函谷秋清候度關  
剡欲相招同此事  
疑君未辦一生閒

六言

功名正恐不免富貴  
酷非所須鐵馬未平  
邊徼釣船且醉江湖

又

嗽飯一簞不盡結廬  
環堵猶寬常得奉祠  
玉局不須草

詔金鑾



又

烏有翁邊貰酒無  
何鄉裏尋花把  
定東風一笑今年別  
是生涯

又

壯歲京華羈旅暮  
年湖海清狂勿倚  
新知可樂笑中白  
刃如霜

作雪未成自湖中歸  
寒甚飲酒作短歌

黑雲垂到地飛霰如  
細礫我從湖上歸  
散髮醉吹笛少

年志功名目視無堅敵慘淡古戰場往往身所歷寧知  
事大繆白首猶寂寂淒涼武侯表零落陳琳檄報主知  
何時誓死空憤激天高白日遠有淚無處滴

題傳神

鹽車心愧渥洼姿邂逅風雲妄自期齧雪豈無歸漢日  
飯牛猶有相齊時君看短褐琴橫膝誰許我冠劍拄頤  
白髮蕭蕭雖憊矣時來或將鎮邊師

李英公平敵  
時已八十餘

閏月三夜舍西觀新月

平生絕愛初三月  
況是平池浸玉鉤  
老去人間朋舊少  
一樽誰與話清愁

獨夜

城上長更續短更  
江平天迴雁方征  
燈明紙帳雪霜色  
火熟銅瓶風雨聲  
濁酒未傾心已怯  
細書時讀眼猶明  
蕭然一室平生慣  
盡下何須擁萬兵

晚出偏門

一段新愁帶宿醒  
半欹烏帽策驢行  
村墟香動梅初破

裘褐寒輕雪未成渡口人爭紅日晚沙邊雁帶碧煙橫  
悠然又覓長堤路腸斷城樓盡角聲

薏苡

蜀人謂其實為薏苡米唐安所出尤奇

初遊唐安飯薏苡米炊成不減雕胡美大如芡實白如玉  
滑欲流匙香滿屋腹腴項鬣不入盤況復殮酪誇甘酸  
東歸思之未易得每以問人人不識嗚呼奇材從古棄  
草菅君試求之籬落間

畲鄭虞任檢法見贈

臥龍山前秋雨晴鄭子過我如夙昔照人睂宇寒巉巉  
懸知筆有千鈞力鏡湖歲暮霜葉空乃聞載酒同諸公  
歸來湖山皆動色新詩一紙吹清風文章要須到屈宋  
萬仞青霄下鸞鳳區區圓美非絕倫彈丸之評方誤人

舟中曉賦

小艇下滄浪吳歌特地長斜分半艙月滿載一篷霜香  
甌炊菰白醇醪點蟹黃宦遊元為口莫恨老江鄉

野興

玉門關外何妨死飯顆山頭不怕窮春瓮已成花欲動  
了無一事着胷中

又

援臂將軍老未衰氣吞十萬羽林兒南山射虎自堪樂  
何用封侯高帝時

月夜有感

炯炯冰輪升澹澹玉宇碧高樓傾美酒一醉不容失陸  
生獨何事閉戶飽岑寂年來負風月豈止此一夕平生

酒邊身欲老每自惜夜闌耿不寐浩歌出金石

落魄

落魄東吳莫笑儂今年要不負春風閒愁擲向乾坤外  
永日移來歌吹中酒浪欲爭湖水綠花光却妒舞衫紅  
公卿憂責如山重肯信人間有放翁

遣興

壯年一箭落雙鷗野餉如今擷藥苗寒與梅花同不睡  
悶尋鸚鵡說無慘烏絲闌上詩初就綠綺聲中酒半消

老去可憐風味在未應山海混漁樵

湖村野興

十里疎鐘到野堂五更殘月伴清霜已知無奈姮娥冷  
瘦損梅花更斷腸

又

山色空濛雨點微醉中不覺濕蓑衣何妨乞與丹青本  
一棹橫衝翠靄歸

看鏡



局促人間百不如每看清鏡歎頭顱醉來風月心雖在  
老去軒裳夢已無棋劫正忙停晚餉詩聯未穩畫寒爐  
棄除尚喜身强健六十登山不用扶

### 塞上

塞上今年有事宜將軍承詔出全師精金錯落八尺馬  
刺繡鮮明五丈旗上谷飛狐傳號令蕭關積石列城隄  
不應幕府無班固早晚燕然刻頌詩

舟過會稽山下因繫舟遊近村追暮乃歸

六十齒髮衰歲月如逝波秦王酒瓮邊知復幾經過欣然捨畫楫仄步捫青蘿一徑入幽谷四面聞樵歌白雲忽破碎翠木相蕩摩湫湫春塘滿柳陰戲雙鵝浮生百憂中此樂顧豈多日暮吾其歸已恐爛斧柯

人日偶遊民家小園有山茶方開

人日西郊路晨光射淺灘停撓喜蕭散照影歎衰殘社酒香浮瓮春蔬綠滿盤山茶雖慰眼不似海雲看

成都海雲

寺山茶花一樹  
千苞特為繁麗

過杜浦橋

橋外波如鴨頭綠  
杯中酒作鵝兒黃  
山茶花下醉初醒  
却過西村看夕陽

又

橋北雨餘春水生  
橋南日落暮山橫  
問君對酒胡不樂  
聽取菱歌煙外聲

上元日晝臥

積雨連上元  
孤愁臥空館  
宿醒殊未解  
欲起意復嬾  
牀

敷蠻氊穩被擁吳綾暖殘香碧縷細軟火紅焰短雖云  
少睡眠聊喜屢展轉昏昏忽已暮一笑呼茗椀

莊器之作招隱閣項平父諸人賦詩予亦繼作

諸公共賦反招隱細字斜行肯見傳語到淮南小山作  
人如江左永和年一窓蘿月禁春瘦萬壑松風撼晝眠  
我亦尚嫌林谷淺因君更擬斲雲煙

春夜讀書感懷

荒林梟獨嘯野水鵝羣鳴我坐蓬窓下畲以讀書聲悲

哉白髮翁世事已飽更一身不自恤憂國涕縱橫永懷  
天寶末李郭出治兵河北雖未下要是復兩京三千同  
德士百萬羽林營歲周一甲子不見邊塵清賊酋實孱  
王賊將非人英如何失此時坐待姦雄生我死骨即朽  
青史亦無名此詩倘不作丹心尚誰明

宿能仁寺

小雨暗江城倦客寄僧榻孤燈如秋螢清夜自開闔遙  
憐萍青青厭聽鼃閣閣窓明竟無寐卯酒倒殘榼

寄題方伯謩遠菴

卷十六

方侯胷中負經濟議論源源有根柢  
借令不用老山林尚欲著書垂萬世  
百年苦短萬世長榮利一時真聚蚬  
渠曹定自別肺肝今夕不為明旦計

雨中宿石帆山下民家

老覺山行倦閒便水宿幽雨泥看放鴨  
煙草聽呼牛槃箸煩頻勸窓扉喜小留  
餘年竟何事高枕送悠悠

中夜雨霽月色入戶起飲酒一杯作絕句

吹盡浮雲天宇清  
城頭疊鼓報三更  
平生無此一杯酒

玉笥峯頭看月生

玉笥峯在石帆之南

### 贈石帆老人

地僻林深客到稀  
高春未起閉柴扉  
新松鬱鬱三千本  
密竹蕭蕭一尺圍  
溪叟旋分菰米滑  
山童新采蕨芽肥  
因君更作長閒想  
麟閣雲臺竟是非

### 溪上醉吟

行行不知溪路深  
但怪素月生遙岑  
不辭醉袖拂花絮

與子更醉青蘿陰

囚山

垣屋叅差綠樹邊  
囚山光景餞華顛  
平川極目思秦地  
大澤浮空憶楚天  
刺虎射麋俱已矣  
舉杯開劍忽悽然  
此生終遣英雄笑  
棘沒銅駝六十年

小園

松菊僅三畝作園真強名  
馴禽驚不去熟果墜無聲  
倦就盤陀坐閒拈柳栗行  
茅亭亦疎豁憑檻看春耕



鄉人或病予詩多道蜀中遨樂之盛適春日遊鏡  
湖共請賦山陰風物遂即杯酒間作四絕句却  
當持以誇西州故人也

嫩日輕雲淡沲天撲燈過後賣花前便從水閣杭湖去  
捲起朱簾上畫船

又

舫子窓扉面面開金壺桃杏間尊罍東風忽送笙歌近  
一片樓臺泛水來

又

湖波綠似鴨頭深一日春晴直萬金好事誰家鬪歌舞  
方舟齊榜出花陰

又

花光柳色滿牆頭病酒今朝嬾出遊却就水亭開小宴  
繡簾銀燭看歸舟

病中

風雨暗江天幽窓起復眠忍窮安晚境留病壓災年客

助修琴料僧分買藥錢餘生均逆旅未死且陶然

病起

開歲忽六十病餘閒炷香春光向客淡夜漏為愁長已  
老鷄豚社永違鷓鴣行蒼龍西角月孤夢墮微茫

小築

小築茅茨鏡水濱天教靜處著閒身平原不復賦豪士  
甫里但思歌散人翠壁微泉時的皜衡門疊嶂曉嶙峋  
子虛誤辱諸公賞萬里輕鷗豈易馴

記夢

東吳春暮寒猶重睡美不聞城角動身雖衰情怕出門  
江山尚入幽窓夢夢到青羊看修竹道人告我丹將熟  
試求一黍換肝腸它日重來駕黃鵠

青羊宮在成都南門外浣花道中

久雨排悶

一春畧無十日晴雨脚纔斷雲已生竒葩摧敗等青莧  
嘉穀漂蕩隨浮萍書生病臥苔及榻濕薪燎衣熏欲盲  
腰頑足痺空歎息咫尺不得行中庭讀書窓黑不見字

彈琴絃緩那成聲老盆濁酒且復醉兩部鼓吹方施行

雨中泊舟蕭山縣驛

端居無策散閒愁聊作人間汗漫遊晚笛隨風來倦枕  
春湖帶雨送孤舟店家菰飯香初熟市擔蓴絲滑欲流  
自笑勞生成底事黃塵陌上雪蒙頭

夜漏欲盡行度浮橋至錢清驛待舟

潮生抹沙岸雲薄漏月明江頭曉色動鴉起人未行扶  
攜度長橋仰視天宇清遙憐繫舟人聽我高屐聲水檻

得小憩一笑拄杖橫澄漪弄孤影微風吹宿醒湛然方寸間不受塵事攪寄語市朝人此樂未易名

江頭十日雨

江頭十日雨雨止春已盡殘紅如掃空草木皆綠潤村墟櫻筍鬧節物團糴近可憐笠澤翁百憂集雙鬢賦詩空自清學道了不進林間一甌茶晤語君勿吝

柯橋客亭

小市初晴已過春朱櫻青杏一番新灞陵老子無人識

暫借郵亭整角巾

又

梅子生仁燕護雛  
遶簷新葉綠扶疎  
朝來酒興不可耐  
買得釣船雙鰕魚

小雨舟過梅市

故故催詩襯雨蓬  
悠悠破夢隔雲鐘  
遙看漁火兩三點  
已過暮山千萬峰  
老矣自應埋病骨  
歸哉莫念抗塵容  
停橈小住青楓岸  
吳市高人儻可逢

曉枕

曉枕鶯聲帶夢聽忽看淡日滿窓櫺閒愁誰遣濃如酒  
醉過殘春不解醒

巢菜

并序

蜀蔬有兩巢大巢豌豆之不實者小巢生稻畦  
中東坡所賦元修菜是也吳中絕多名漂搖草  
一名野蠶豆但人不知取食耳予小舟過梅市  
得之始以作羹風味宛如在醴泉墓頭時也



冷落無人佐客庖  
庾郎三九困譏嘲  
此行忽似墓津路  
自候風爐煮小巢

吳娘曲

鏡奩蠶出千黑蟻  
釵梁梅小雙青豆  
吳娘十四未知愁  
羅衣已覺傷春瘦  
閒尋女伴過西家  
鬪草歸來日未斜  
睡睫濛濛嬌欲閉  
隔簾微雨壓楊花

感舊

醉眼常輕兒女曹  
西遊對客尚能豪  
縷金羯鼓龜茲樂

鏤玉琵琶邏迤槽  
巫峽已回行雨夢  
錦江空憶浣花遨  
閒情何計都除盡  
為覓并州快剪刀

晨起閒步

飛紅掠地送春忙  
嫩綠成陰帶露香  
聽徹曉天鶯百轉  
却隨飛蝶度橫塘

初夏同桑甥世昌過隣家

空谷舊生涯蕭條只自嗟  
妻饒嗔護筍兒病失澆花赤  
米老能飽濁醪貧可賒  
徵科幸差簡扶杖過隣家

寓歎

孤生拙料事諸老誤知人世故幾翻覆此身常賤貧有  
書藏禹穴無地靜邊塵衰病今年劇呻吟欲過旬

春夏雨暘調適頗有豐歲之望喜而有作

二十年無赤白囊人間何地不耕桑陂塘處處分秧遍  
村落家家煮繭忙野老逢年知飽煖書生隨例得猖狂  
雨餘天氣初清潤曳履長歌出草堂

聞邊酋遁歸漠北

幽州遺民歎塞來來者扶老攜其孩共言單于遠逃遁  
一夕荊棘生燕臺天威在上賊膽破捧頭鼠竄吁可哀  
妄期舊穴得孳育不知天網方恢恢老上龍庭豈不遠  
漢兵一炬成飛灰陛下中興天所命築壇授鉞皆雄才  
煌煌九霄揭日月浩浩萬里行風雷號山多獸可遊獵  
汝不請命何歸哉

初夏遊凌氏小園

水滿池塘葉滿枝曲廊危榭愜幽期風和海燕分泥處

日永吳蠶上簇時  
閒理阮咸尋舊譜  
細傾白墮賦新詩

從來夏淺勝春日  
兒女紛紛豈得知

庾信詩云夏淺却勝春  
鏡湖遊人至

立夏而止

偶得北境金泉酒  
小酌

草草杯盤莫笑貧  
朱櫻羊酪也嘗新  
燈前耳熱顛狂甚

邊酒誰言不醉人

高適詩云敵人十歲能騎馬  
邊酒千盃不醉人

又

邊人萬里跨燕秦  
志士悲歌淚滿巾  
未履戰場齊奏凱

一樽先醉范陽春

無題

珠鞦玉指擘箜篌誰記山南秉燭遊  
結綺詩成江令醉  
橐泉夢斷沈郎愁  
天涯落日孤鴻沒  
鏡裏流年兩鬢秋  
不用更求驅豆術  
人生離合判悠悠

戲贈

簾幕陰陰晝漏遲  
鵝黃雪白絡新絲  
只應笑殺東隣女  
不見鞦韆到折時

題少陵畫像

長安落葉紛可掃九陌北風吹馬倒杜公四十不成名  
袖裏空餘三賦草車聲馬聲喧客枕三百青銅市樓飲  
杯殘炙冷正悲辛仗內鬪雞催賜錦

閒居書事

園林綠葉一番新桃李吹成陌上塵玩易焚香消永日  
聽琴煮茗送殘春隱居正欲求吾志大患元因有此身  
堪笑癡人營富貴百年贏得冢前麟

登臺遇雨避於山亭晚霽乃歸

溽暑不堪蝸舍陋，瘦藤扶我上危臺。  
搏禽俊鶻橫空去，卷雨狂風掠野來。  
壯觀深知化工妙，幽尋却蹋夕陽回。  
悠然有喜君知否，屐齒留痕遍綠苔。

村居書觸目

雨霽郊原刈麥忙，風清門巷曬絲香。  
人饒笑語豐年樂，吏省徵科化日長。  
枝上花空閒蝶翅，林間甚美滑鶯吭。  
飽知遊宦無多味，莫恨為農老故鄉。



訪醫

衰與病相藥況復積憂慮眩昏坐輒瞑疲弱行欲仆今  
晨訪之醫見語疾當去脉來如泉源未易測君數盛衰  
當自察信醫固多誤養氣勿動心生死良細故

夏夜讀書自嘲

事業無成去日適只今身世付滄洲風煙慘慘菰蒲老  
星斗離離河漢流寂寞書生學竒字窮愁客子著春秋  
白頭自苦君無笑骨朽成塵志未休

夏日小宴

橫吹銅笛蒼龍聲雙奏玉笙丹鳳鳴已判百年終醉死  
要將一笑壓愁生旋移畫舫破山影高捲朱簾延月明  
試問炎歊在何許夜闌翻怯葛衣輕

送紫霄女道士四明謝君

一別南充十四年時時清夢到金泉山陰道上秋風早

却見神仙小自然

果州金泉山謝  
自然飛昇之地

又

道骨仙風凜不羣  
清秋采藥到江村  
自言家住雲南北  
知是遺塵幾世孫

醉中夜自村市歸

村市夜騎黃犢還  
却登小閣倚闌干  
銀河斜界曉天碧  
璧月下入秋江寒  
吾輩身閒且飲酒  
人生事定須闔棺  
元自胷中著雲夢  
莫驚綠鬢耐悲歡

城北夜

端居厭孤寂  
偶繫北城舟  
天地淒涼色  
江湖汗漫遊  
螢

光矜暗夜蟲語報新秋老去功名意青燈映布襦

秋夜舟中作

沽酒黃葉村炊飯紅蓼岸居人不孰何正作漁父看漁  
父我所羨尚恐不得作讀書端自癡遊宦亦何樂四顧  
澤茫茫仰視天離離長歌入雲去月落斗未歌

日晚散步湖上遇小雨

暮色蒼蒼日初落寒聲策策風正作湖邊倚杖隄上行  
病起聊試遊山脚平生出門輕萬里老去謝客專一壑

風濤傾洞鮫鰐橫閭闔崔嵬鬼神惡春蕪二頃叱黃犢  
老學為農元不錯兜鍪蟬冕俱掃空雨笠香新織青窮

安期篇

我昔遊岷峨捫蘿千仞峯丈人倚赤藤恐是安期翁贈  
我一丸藥五雲出瓢中服之未轉刻瑩然冰雪容素手  
掬山靄綠髮吹天風丈人顧我喜共騎一蒼龍蓬萊亦  
何求愛此萬里空却來過齊州螳垤看青嵩

曉望海山

暮山青尚淺曉山如黛染開窓望海山天清霧方歛向  
來六月中黑雲齊如截蒼龍下曳尾卷雨灑炎熱造物  
信老手忽作萬里秋刻削此孤峭巉然消客愁豈無一  
布帆寄我浩蕩意會當駕長風清嘯遺世事

山園草木四絕句

紫薇

鐘鼓樓前宮樣花誰令流落到天涯少年妄想今除盡  
但愛清樽浸晚霞

黃蜀葵

開時閒淡斂時愁  
蘭菊應容預勝流  
剗欲持杯相領畧  
一庭風露不禁秋

拒霜

滿庭黃葉舞西風  
天地方收肅殺功  
何事獨蒙青女力  
牆頭催放數苞紅

蓼花

十年詩酒客刀州  
每為名花秉燭遊  
老作漁翁猶喜事

數枝紅蓼醉清秋

賽神曲

叢祠千歲臨江渚拜貺今年那可數  
須晴得晴雨得雨人意所向神輒許  
嘉禾九穗持上府廟前女巫遞歌舞  
嗚嗚歌謳坎坎鼓香煙成雲神降語  
大餅如槃牲腍肥再拜獻神神不違  
晚來人醉相扶歸蟬聲滿廟鎖斜暉

夜中起讀書戲作

髮已凋零齒已疎忍飢白首臥蝸廬  
風聲忽轢蓬窓過



夜半呼燈起讀書

又

滅敵區區計本疎  
水邊喬木擁茅廬  
九原定發韓公笑  
至老依然一束書

秋夜出門觀月

六十衰翁適得閒  
一秋無事掩柴關  
雁來慘淡沙場外  
月出蒼茫雲海間  
飲酒已衰猶愛客  
著書初畢可藏山  
此生終羨漁家樂  
小艇常衝夕靄還

雨中買酒鏡湖酒樓

陰風號大澤暮雨上高樓愁憶新豐酒寒思季子裘登  
臨天地迤老病歲時適安得急裝去北平防盛秋

聞邊寇衰亂掃蕩有期喜成口號

正朔今年被百蠻遙知喜色動天顏風雷傳號臨春水

春水敵  
都名

貌虎移軍過玉關博士已成封禪草單于將就

會朝班孤臣老抱周南恨壯觀空存夢想間

又

遺敵遊魂豈足憂漢家方運幄中籌天開地闢逢千載  
雷動風行遍九州刁斗令嚴青海夜旌旗色照鐵關秋  
功名自是英豪事不用君王萬戶侯

甲辰中秋無月十七夜獨皦然達旦

老覺人間無一欣窮閭掃軌謝紛紛已憑白露洗明月  
更遣清風收亂雲棲鵲揀枝寒未穩斷鴻呼伴遠猶聞  
病羸慵踏梧桐影倚柱長吟夜向分

悲秋

病後支離不自持湖邊蕭瑟早寒時已驚白髮馮唐老  
又起清秋宋玉悲枕上數聲新到雁燈前一局欲殘棋  
丈夫幾許襟懷事天地無情似不知

農家秋晚戲詠

鞭地如鏡築我場破礮玉粒輸官倉九月野空天欲霜  
甌中初喜新粳香舍邊蕭蕭落葉多野蠶出繭飛黃蛾  
寒蔬種罷醉且歌隻雞短紙賽園婆

病中作

老鶴遼天興未窮此生光景自匆匆家為逆旅相逢處  
身在嚴裝欲發中澀眼尚于書有味孤愁殊覺酒無功  
揮戈草檄今誰記歲晚江邊白髮翁

秋夜讀書

讀書喜夜長著書悲齒暮平生企前哲凜有庸人懼吾  
廬大澤中地曠北風怒徂年凋草木寒氣逼霜露燈昏  
老眼闇鈍馬行惡路投枕卷未終吾衰歎非故

病起

金人詩集卷十六  
頽垣破屋暗藜蒿病起不知秋已高  
晨倚山楹羣木脫  
暮臨苔砌百蟲號  
力殫編簡初何得腰折塵埃只漫勞  
賴有濁醪生耳熱狂歌醉草寄吾豪

### 晨起

孤夢忽自驚小窓初送明珍禽語庭樹可愛不知名  
向者事宜遊塵土過半生傳呼束帶出皦皦尚殘更  
山居雖自由晨起亦有程洗硯拂書几一笑愜幽情

### 秋夜

老病龍鍾不入城  
濁醪麤飯餒餘生  
未霜村舍秋先冷  
無月江天夜自明  
出塞雖慙平賊手  
下帷聊喜讀書聲  
山童睡熟青燈暗  
自撥殘爐候藥鐙

雨中過東村

小雨空濛物象奇  
偶扶藤杖過東陂  
墊巾風度人爭看  
蠟屐年光我自悲  
窮鬼有靈揮不去  
死魔多力到無期  
歸來笑向簷門說  
且了浮生一首詩

山寺

寺門壓石危欲崩槎牙老松挂蒼藤風傳上方出定磬  
雨暗古殿長明燈宿林野鶻驚復起爭栗山童呼不應  
谿南聞道更幽絕明日裂布縫行滕

天王廣教院在戴山東麓予年二十餘時與老僧  
惠迪遊畧無十日不到也淳熙甲辰秋觀潮海  
上偶繫舟其門曳杖再遊恍如隔世矣

遊山如讀書深淺皆可樂道邊小精舍亦自一丘壑淒  
涼四十年始復重著脚老僧逝已久講座塵漠漠當時



童子輩衰鬢亦蕭索掃壁觀舊題歲月真電電文章早  
不傳衣食窘如昨出門意惘然遠海渺孤鶴

### 江月歌

放翁平生一釣船秋水未落江渺然露洗玉宇清無煙  
月輪徐行萬里天人間聲利何足捐浩歌看月冷不眠  
孤鶴掠水來翩翩似欲駕我從此仙我寓紅塵今幾年  
俛首韁鎖常自憐樂哉揮手過月邊西風未凋玉井蓮

### 初寒書懷

嵩雲緱月本閒人誤落塵中白髮新萬事看山差入眼  
百年把酒獨關身棧邊老馬行安往牀下寒龜息自勻  
藜杖一枝猶好在未妨閒探早梅春

歲暮

小築幽栖與拙宜讀書寫字伴兒嬉已無歎老嗟卑意  
却喜分冬守歲時羹臠芳鮮新弋雁衣襦輕暖自繅絲  
農家歲暮真堪樂說向公卿未必知

晨興

倦枕厭寒夜起尋殘火溫  
噤噤衆雞動耿耿一燈昏  
野氣增霜力窓光淡月痕  
早朝非老事且復灌吾園

### 村飲

少年喜任俠見酒氣已吞一飲  
但計日斗斛何足論  
綠草滿雉場紅旗植球門  
三叫落烏幘倒瀉黃金盆  
銀爐熾獸炭狐兔紛炮燔  
浩歌撼空雲壯志排帝閭  
回首今幾時去日如車奔  
朱顏辭曉鏡白髮老孤村  
隣翁勸黍酒稚子供魚飧  
功名信已乎萬事付乾坤

夜半讀書罷出門徙倚久之歸賦長句

浩歌曳杖出柴扉  
不管三更露濕衣  
擬看林梢殘月上  
偶逢浦口斷雲歸  
驚鴻脫網寒相倚  
飢鶻思巢夜亦飛  
却掩北窓誰晤語  
聊憑香盃洗塵鞿

曝書偶見舊橐有感

日滿晴軒理蠹魚  
壯遊回首一欷歔  
淒涼王粲從軍作  
零落相如諫獵書  
歌吹恍思登北固  
弓刀誰記渡南沮  
虎頭本欠功名相  
歸老林間計未疎

崑崙行

陰雲解駁朝暎紅黃河直與崑崙通不駕鸞鳳駮虬龍  
徑躡香煙上空中吾行忽過日月宮下視積氣青濛濛  
寒暑不分晝夜同嵯峨九關常烈風凜然蕭森變沖融  
不悸不眩身如空塵沙浩劫環無窮詎須更覓安期翁

一室

九萬笑鵬搏幽居一室寬雨聲便早睡酒力壓新寒嬾  
覺閒多味衰知死有端此生吾自斷不必夢邯鄲

得所親廣州書

音信連年恨不聞書來細讀却消魂人稀野店山魈語  
路僻蠻村荔子繁毒草自搖春寂寂瘴雲不動晝昏昏  
此生相見應無日且置清愁近一樽

幽居戲詠

清泉遶屋竹連牆回首微官意已忘小瓮帶泥收洛筍


洛中冬筍貯以小瓮為遠餉

細鱗穿柳買河魴黃旗萬里無侯骨紅

燭千鍾有酒腸欲起九原誰可友蘭亭修禊晉諸王

幽事

蕭然四壁野人家幽事還堪對客誇  
快日明窓閒試墨寒泉古鼎自煎茶  
桐凋無復吟風葉蘋老猶殘泣露花  
萬里封侯真已矣只將高枕作生涯



劔南詩藁卷十六